

20. april 2007

UPA 2007/42

**Siusinaartumik pensionisiat pillugit Inatsisartut peqqussutissaattut siunnersuut  
pillugit**

**Inatsisartut Ilaqutariinnermut ataatsimiititaliaata**

**ISUMALIUTISSIISSUTAA**

**Siunnersuutip aappassaaneerneqarnerani saqqummiunneqartoq**

Inatsisartut Ilaqutariinnermut Peqqissutsimullu Ataatsimiititaliaat suliarinninnermini ukuninnga inuttaqarpoq:

Inatsisartunut ilaasortaq Olga P. Berthelsen, Inuit ataqatigiit, siulittaasoq  
Inatsisartunut ilaasortaq Emilie Olsen, Atassut, siulittaasup tullia  
Inatsisartunut ilaasortaq Ruth Heilmann, Siumut  
Inatsisartunut ilaasortaq Agnethe Davidsen, Siumut  
Inatsisartunut ilaasortaq Astrid Fleischer Rex, Demokraatit

Aammattaaq siunnersuummik suliarinninnermi Vittus Mikaelson sinniisussatut peqataavoq.

Inatsisartut Ilaqutariinnermut Peqqissutsimullu Ataatsimiititaliaata siullermeerinnerup kingorna peqqussutissatut siunnersuut nassuiaatitalu ulloq 20. marts misissuataarjaa.

**Tusarniaanermi akissutit**

Siunnersuummi matumani ataatsimiititaliap suliarinninnermini atugassaminik tusarniaanermi akissutigineqartut nuutinnerinik ataatsimiititaliap pissarsiniarsimavoq.

Tusarniaanermi akissuteqaatit tiguneqartut Ilaqutariinnermut Ataatsimiititaliap qujassutigai.

**Ilaqutariinnermut Ataatsimiititaliap siunnersuummut oqaaseqaatai**

Siunnersuummi matumani UKA 2006-imeersumi Inatsisartuni aalajangiineq, matumani siusinaartumik soraarnerussutisiat utoqqalinersiallu

avissaartinneqarnissaannut tunngasoq Naalakkersuisut malimmassuk  
Ilaqutariinnermut Ataatsimiititaliap naammagisimaarlugu maluginiarpa.

Siunnersuut una akuersissutigineqassappat siusinaarlutik soraarnerussutisialinnut  
malittarisassat atuuttut immikkut malittarisassaqlutik attatiinnerneqassapput,  
taamaaliornikkut malittarisassat atuisunut paasiuminarnerullutillu  
aqukkuminarnerussapput.

Siunnersuummi malittarisassat atuuttut allanngortinneqarnissaat  
anguniarneqanngilaq. Taamaattorli UPA 2007/41-p utoqqalinersiat pillugit aamma  
siunnersuummut sanilliullugu siunnersuummi naleqqussaasoqassaaq.

Inuit siusinaartumik soraarnerussutisiaqarsinnaasut, utoqqalinersiaqalersinnaaneq  
pillugu malittarisassani ukiumikkut naleqqussarneqarnissaat siunnersuutigineqarpoq,  
taamaaliornikkut inuit 18-it aamma 65-it akornanni ukiullit 2010 aallarnerfigalugu  
siusinaartumik soraarnerussutisiaqalersinnaaqullugit, matumani piumasaqaatinik  
naammassinnissimagunik. Siusinaartumik soraarnerussutisiat pillugit  
paasisutissanik kommunit Naalakkersuisunut nassitsisarnissaannik utoqqalinersiat  
pillugit siunnersuut assigalugu siunnersuutigineqartoq erseqqissaataavoq.

### **Ilaqutariinnermut Ataatsimiititaliap oqaaseqaatai allat**

Naalakkersuisut saqqummiussisutaanni makku oqaatigineqartut Ilaqutariinnermut  
Ataatsimiititaliamit tapersorneqarput:

*Siusinaartumik pensionisiat aningaasartaat allannguuteqartinneqanngillat.  
Tamanna siusinaartumik pensionisiaqartut ataatsimut isigalugit  
sulisinnaassuseqarnermik siusinaartumik pensionisialinnut ataasiakkaanut  
inuiaqatigiinnullu iluaqutaasumik pitsaanagerusumillu  
atorluarniarneqartariaqartumik peqarnerannut ataneqartillugu isigineqassaaq.  
Taamaallit Naalakkersuisut isumaqarput siusinaartumik pensionisiaqartut  
amerlanersaasa, immaqalu pingaartumik inuusunnersaasa, ilaatigut  
pikkorissartitsinertigut, suliffitsigut naleqqussagaasutigut, sulianut allanut  
sungiusarneqarnertigut taakkulu assigisaasigut inuuniarnerminni atukkamik  
anigaasanik pisartagaqarnikkut pilersugaanerminnit pitsaanagerulernerat  
annertunerusumik misigissagaat.*

Inersimasut sapinngisaminnik inuiaqatigiinni suliassarpasuit pingaarutillit  
ingerlaavartut ilaannik isumaginneqataassasut Ilaqutariinnermut Ataatsimiititaliap  
isumaqarpoq. Tamanna utaqqiinnarluni pisortanit pilersorneqarnissaminnngarnit  
pilerinarneruvoq. Siusinaartumik soraarnerussutisiallit pillugit inatsit  
sukkanerusumik kajumissuseqalersitsinissamillu imaqarnissaa, inuit ataasiakkaat  
ilorrisimaarnissaannut inooriaasiinullu sammisoq imartuumullu tapersersuinissaq  
tunngavissallu nukittorsarneqarnissaat Ilaqutariinnermut Ataatsimiititaliap  
kissaatigaa.

Tamatumani inuttut aningaasaqarniarnikkullu atukkat eqqarsaatigalugit aammalu  
pikkorissartarnermi ilinniaqqittarnermilu tunngavigisat nukittorsarneqarnissaannut  
periarfissaq kiisalu suliffeqarnermi inissaqarluartumik eqaatsumillu

tungavissaqalernissamut atatillugu. Tassunga atatillugu suliffeqarnermik inissaqartitsisumik eqaatsumillu pilersitsinissamut sulisitsisut akisussaaqataanissaat pisariaqartoq Ilaqutariinnermut Ataatsimiititaliap erseqqissassavaa.

### **Ilaqutariinnermut Ataatsimiititaliap inassuteqaatai**

Siusinaartumik soraarnerussutisialinnut atugassarititaasut nukittorsarneqarnissaat siunertaralugu siusinaartumik soraarnerussutisialinnut atugassarititaasut pillugit piaartumik nassuiaammik suliaqartoqassasoq Ilaqutariinnermut Ataatsimiititaliap innersuussutigaa. Taamaaliornikkut *pensionit pillugit nalunaarusiaq 2006-imeersoq* assigalugu, siusinaartumillu soraarnerussutisialinnut atugassarititaasut pitsaanerulersinniarlugit suliap ingerlateqqinneqarnissaa siunertarineqarpoq.

### **Ilaqutariinnermut Ataatsimiititaliap siunnersuummut inassuteqaataa**

Siunnersuutip taamatut iluseqartillugu akuersissutigineqarnissaa Ilaqutariinnermut Ataatsimiititaliap Inatsisartunut inassutigaa.

Taama naatsumik oqaaseqarluni Inatsisartut Ilaqutariinnermut Ataatsimiititaliaata siunnersuut aappassaaniigassanngortippaa.

Olga P. Berthelsen  
Siulittaasoq

Emilie Olsen

Ruth Heilmann

Agnethe Davidsen

Astrid Fleischer Rex